

四庫全書

集部

欽定四庫全書

集部

錢仲文集卷六至十

詳校官太常寺少卿<sub>臣</sub>陳桂森

檢討<sub>臣</sub>何思鈞覆勘

總校官檢討<sub>臣</sub>何思鈞

校對官編修<sub>臣</sub>閔懌大

謄錄監生<sub>臣</sub>許溶

欽定四庫全書

錢仲文集卷六

唐 錢起 撰

五言四韻近體三十九首

五韻十三首

賦得寒雲輕重色送子恂入京

無限寒雲色蒼茫淺更深從龍如有瑞捧日不成陰積  
翠金低嶺虛明半出林帝鄉遙在目鐵馬又駸駸

賦得叢蘭曙後色送梁侍御入京

曙色傳芳意分明錦繡叢蘭生  
霽後日花發夜來風不  
向三峯裏全勝一縣中  
遙知大苑內應待五花驄

賦得餘冰

曉日

一作月

餘冰上春池一鏡明  
多從履處薄偏向飲時

清比雪光仍在因風片  
不成更隨舟楫去猶可助堅貞

賦得浦口望斜月送皇甫判官

起見西樓月依依向浦斜  
動搖生淺浪明滅照寒沙  
水

渚猶疑雪梅林不辨花送君無可贈持此代瑤華

賦得綿綿思遠道送岑判官入嶺

極目煙霞外孤舟一使星興中尋白雪

一作碧落

夢裏過滄

溟夜月松江戍秋風竹塢亭不知行遠近芳草日青青

江寧春夜裴使君送蕭員外

花院日扶疎江雲自卷舒主人熊軾任歸客雉門車曙  
月稀星裏春煙紫禁餘行看石頭戍記得是南徐

送薛八謫居

東水將孤客南行路幾千虹翻潮上雨鳥落瘴中天謫  
去寧留恨思歸豈待年啣盃且一醉別淚莫潛然

送衡陽歸客

歸客愛鳴榔南征憶舊鄉江山追宋玉雲雨憶荆王醉  
裏宜城近歌中郢路長憐君從此去日夕望三湘

送員外侍御入朝

別思亂無緒妖氛猶未清含香五夜客持賦十年兄霜  
拂金波樹星回玉斗城自憐江上鶴垂翅羨飛鳴

送李諫議歸荊州

歸舟同不繫，纖草剩忘憂。  
禁掖曾通籍，江城舊列侯。  
暮帆依夏口，春雨夢荊州。  
何日朝雲陞，隨君拜冕旒。

送元中丞江淮轉運

薄稅歸天府，輕徭賴使臣。  
歡沾賜帛老恩及，卷綃人去  
問殊官。俗來經幾劫，春東南  
卸亭上。莫問有風塵。

送唐別駕赴郢州

少年從事好，此去別愁輕。  
滿坐詩人興，隨君郢路行。  
薰

葭侵驛樹雲水抱山城  
遇愛下車日江皋春草生

送鄭巨及第後歸覲

多才白華子初擅桂枝名  
嘉慶送歸客新秋帶雨行  
離人背水去喜鵲近家迎  
別贈難為此衰年畏後生

宿遠上人蘭若

香花閉一林真士此看心  
行道白雲近燃燈翠壁深  
梵筵清水月禪坐冷山陰  
更說東溪好明朝乘興尋

酌元秘書晚出藍溪見寄



野興引才子獨行幽徑遲雲留下山處鳥靜出溪時拙  
宦不忘隱歸休長在茲知音倘相訪炊黍掃茅茨

別張起居

有別時留恨銷魂況在今風濤初振海鷁鷺各辭林舊  
國關河絕新秋草露深陸機嬰世網應負故山心

郭司徒廳夜宴

秋堂復夜闌舉目盡悲端霜堞烏聲苦更樓月色寒美  
人深別意斗酒少留歡明發將何贈平生雙玉盤

初至京口示諸弟

還家百戰後訪故幾人存兄弟得相見榮枯何處論  
新詩添卷軸舊業見兒孫點檢平生事焉能出蓴門

月下洗藥

汲井向新月分流入衆芳濕花低桂影翻葉靜泉光露  
下添餘潤蜂驚引暗香寄言養生客來此共提一作筐

晚春永寧墅小園獨坐寄上王相公

東閣一何靜鶯聲落日愁夔龍暫為別昏旦思兼秋  
蕙

草出籬外花枝寄竹幽上方傳雅頌十夕讓風流

歲暇題茅茨

谷口逃名客歸來遂野心薄田供歲酒喬木待新禽溪  
路春雲重山厨夜火深桃源應漸好仙客許相尋

九日登玉山

霞景青山上誰知此勝遊龍沙傳往事菊酒對今秋步  
石隨雲起題詩向水流忘歸更有處松下片雲幽

宴崔駙馬玉山別業

金榜開青鎖，驕奢半隱淪。  
玉簫惟送酒，羅袖愛留賓。  
竹館烟催暝，梅園雪悞春。  
滿朝辭賦客，盡是入林人。

春谷幽居

黃鳥鳴園柳，新陽改舊陰。  
春來此幽興，宛是謝公心。  
掃逕蘭芳出，添池山影深。  
虛名隨振鷺，安得久棲林。

賦得池上覆丁香樹

得地移根遠，交柯遶指柔。  
露香濃結桂，池影鬪蟠虬。  
黛葉輕筠綠，金花笑菊秋。  
何如南海外，雨露隔炎洲。

題樊川杜相公別業

數畝園林好人知，賢相家結茅書閣。  
儉帶水榭籬斜古，樹生春蘚新荷卷。  
落花聖恩加玉鉉，安得卧青霞。

訓盧十一過宿

乞還方未遂，日夕望雲林。  
沉復逢青草，何妨問此心。  
閑門公務散，枉策故情深。  
遙夜他鄉宿，同君梁甫吟。

崔十四宅問候

曉日早鶯啼，江城旅思迷。  
微官同寄傲，移疾阻招携。  
遠

水間閭內青山雉堞西王孫莫久卧春草欲萋萋

山路見梅感而有作

莫言山路僻還被好風催行客淒涼過村籬冷落開晚  
溪寒水照晴日數峯來重憶江南酒何因把一盃

詠門上畫松上元王杜三相公

昔聞生澗底今見起毫端衆草此時沒何人知歲寒豈  
能裨棟宇且欲出門關只在丹青筆凌雲也不難

早發東陽

信風催過客早發梅花橋數鴈起前渚千艘爭便潮將  
隨浮雲去日惜故山遙惆悵烟波未佳期在碧霄

舟中寄李起居

南行風景好昏旦水臯閒春色郢中樹晴霞湖上山去  
家旅帆遠回首暮潮還蕙草知一作欲何贈故人雲漢間

夜雨寄寇校書

秋館烟雨合重城鐘漏深佳期阻清夜孤興發離心燭  
影出綃幕虫聲連素琴此時蓬閣友應念昔同衾

喜李侍御拜郎官入省

粉署花驄入丹霄紫誥垂直廬驚漏近賜被覺霜移漢  
主前瑤席穰侯許鳳池應憐後行雁空羨上林枝

蘇端林亭對酒喜雨

小雨飛林頂浮涼入晚多能知留客處偏與好風多濯  
錦翻紅藥跳珠亂碧荷芳罇深幾許此興可酣歌

見上林春雁翔青雲寄楊起居李員外

上林春更好賓雁不知歸顧影憐青藥傳聲入紫微夜



陪池鷺宿朝出苑花飛寧憶寒鄉侶鷺凰一見稀

偶成

含毫意不淺微月上簾櫳門靜吏人息心閒囹圄空繁  
星入疎樹鷺倦秋風始覺牽卑劇宵眠亦在公

漁潭值雨

日入林島異鶴鳴風草間孤帆泊枉渚飛雨來前山客  
意念留滯川途忽阻難赤亭仍數里夜待安流還

題蕭丞小池

欽定四庫全書

錢仲文集  
卷六

八

鶯鳴蕙草綠朝與人情期林沼忘言處鴛鴻養翮時春  
泉滋藥煖晴日度花遲此會無辭醉良辰難再追

送集賢崔八叔承恩括圖書

雨露滿儒服天心知子虛還勞五經笥更訪百家書贈  
別傾文苑光華壯使車晚雲隨客散寒樹出關疎相見  
應朝夕歸期在玉除

送張五員外東歸楚州

纓珮不為美人羣寧免辭杳然黃鵠去未負白雲期此

別清興盡高秋臨水時好山在帆僻浪跡到家遲他日  
詔書下梁鴻安可追

閒居寄包何

去名即棲遁何必歸滄浪種藥幽不淺杜門喧自忘林  
眠多曉夢鷗散驚初陽片雪幽雲至迴風鄰果香佳期  
碧天末惆悵紫蘭芳

津梁寺尋李侍御

禪林絕過客柱史正焚香馴鷁不猜隼慈雲能護霜驄

聲隔暗竹吏事散空廊  
霄漢期鴛鴦狐狸避憲章  
遠階春色至屈草待君芳

山園秋晚寄杜黃裳少府

惆悵佳期阻園林秋景閒  
終朝碧雲外唯見暮禽還  
泉石思攜手烟霞不閉關  
杖藜仍把菊對卷也看山  
望望離心起非君誰解顏

東溪杜野人致酒

萬重雲樹下數畝子平居  
野院羅泉石荆扉背里閭  
早

冬耕鑿暇弋雁復烹魚靜掃寒花徑唯邀傲吏車晚來  
留客好小雪下山初

憶山中寄舊友

數歲白雲裏與君同采薇樹深烟不散溪靜鷺忘飛更  
憶東巖趣殘陽破翠微脫巾花下醉洗藥月前歸風景  
今還好如何與世違

東臯早春寄郎四校書

祿微賴學稼歲起歸衡茅窮達戀明主耕桑亦近郊夜

來霽山雪陽氣動林梢蘭蕙煖初吐春鳩鳴欲巢蓬萊  
時入夢知子憶貧交

玉山東溪題李叟屋壁

霞景已斜照烟溪方暝投山家歸路僻轍跡亂泉流野  
老採薇暇蝸廬招客幽麇麇突荒院鷓鴣步閒疇偶此  
愜真性令人輕宦遊

溫泉宮禮見

新豐佳氣滿聖主在溫泉雲煖龍行處山明日馭前順

風求至道側席問遺賢  
靈雪瑤墀降晨霞綵仗懸  
滄溟不讓水疵賤也朝天

遊襄陽泉石晚歸

遊目隨山勝迴橈愛浦長  
往來幽不淺昏旦興難忘  
木末看歸翼蓮西失夕陽  
人聲指閭井野趣惜林塘  
稍近垂楊路菱舟擁岸香

夏日陪史郎中宴杜郎中果園

何事重逢迎春醪晚更清  
林端花自老池上月初明  
路

入仙郎次烏連柱史名竹陰疎柰院山翠傍蕪城引滿  
不辭醉風來待曙更

南溪春耕

荷蓑趣南逕戴勝鳴條枚溪雨有餘潤土膏寧厭開溝  
塍落花盡耒耜度雲迴誰道耦耕倦仍兼勝賞催日長  
農有暇悔不帶經來

錢仲文集卷六



欽定四庫全書

錢仲文集卷七

唐 錢起 撰

五言六韻近體三十五首

省試湘靈鼓瑟

善鼓

一作拊

雲和瑟常聞帝子靈馮夷空自舞楚客不堪

聽苦調淒金石清音入杳冥蒼梧來

一作成

怨慕白芷動

芳馨流水傳瀟浦悲風過洞庭曲終人不見江上數峰

青

觀法駕自鳳翔迴

攬槍一掃滅閭闔九重開海晏鯨鯢盡天旋日月來聖

情蘇品物龍御

一作馭

闢雲雷曉漏移仙仗朝陽出帝臺

周慚散馬出禹讓濬川迴欲識封人願南山舉酒杯

題玉山村叟壁

谷口好泉石居人能陸沉牛羊下山小烟火隔雲深一  
逕入溪色數家連竹陰藏虹辭晚雨驚隼落殘禽涉趣

皆流目將歸羨在林却思黃綬事辜負紫芝心

縣中池竹言懷

官小志已足時清免負薪卑棲且得地榮耀不關身自  
愛賞心處叢篁流水濱荷香度高枕春色滿南隣道在  
即為樂機忘寧厭貧却愁丹鳳詔來訪漆園人

山園棲隱

守靜信推分灌園樂在茲且忘堯舜力寧顧尚書期晚  
景採蘭暇空林散帙時卷荷藏露滴黃口觸虫絲三徑

與囂遠一瓢常自怡情人半雲外風月詎相思

送王諫議任東都居守

車徒鳳掖東去去洛陽宮暫以青蒲隔還看紫禁同經  
過乘雨露瀟洒出鴛鴻官署名臺下雲山舊苑中暮天  
雙闕靜秋月九重空且喜成周地詩人播國風

送鄭書記

決勝無遺策辭天便請纓出身唯殉死報國且能兵受  
命麒麟殿叅謀驃騎營短簫催別酒斜日駐前旌義勇

千夫敵風沙萬里行幾年丹闕下侯印錫書生

送族姪赴任

林下不成興仲容微祿牽客程千里遠別念一片

一作帆

懸欲嘆卑棲去其如勝趣偏雲山深郡郭花木淨潮田  
坐嘯帷應下離居月復圓此時知小阮相憶綠樽前

長安落第作

始願今如此前途復若何無媒獻詞賦生事日蹉跎不  
遇張華識空悲甯戚歌故山歸夢遠新歲客愁多刷羽

思喬木登龍恨失波散才非世用回首謝雲羅

酬長孫繹藍溪寄杏

愛君藍水上種杏近成田拂逕清陰合臨流綵實懸清  
香和宿雨佳色出晴烟慙此傾筐贈相知懷橘年芳馨  
來滿袖瓊玖願酬篇把玩情何極雲林若眼前

樂堂秋暮

隱來未得道歲去愧雲松茅屋空山暮荷衣白露濃唯  
憐石苔色不染世人蹤潭靜宜孤鶴山深絕遠鐘有時

丹竈上數點絳霞重勉事壺公術仙期待赤龍

哭常徵君

萬化一朝盡窮泉悲此君如何丹竈術能悞紫芝焚不  
遂蒼生望空留封禪文遠年隨逝水真氣盡浮雲山閉  
龍蛇蟄林寒麋鹿羣傷心載酒地仙菊為誰薰

送鮑中丞赴太原軍營

年壯才仍美時來道易行寵兼三獨任威肅貳師營將  
略過南仲天心寄北京雲旂臨塞色龍笛出關聲漢月

隨霜去邊塵計日清漸知王事好文武用書生

奉送劉相公江淮催轉運

國用資戎事臣勞為主憂將徵任土貢更發濟川舟擁  
傳星還去過池鳳不留唯高飲冰節稍淺別家愁落葉  
淮邊雨孤山海上升秋遙知謝公興微月在江樓

送李秀才落第遊荆楚

翠羽雖難

一作難

成夢遷鶯尚後羣名逃却詵策興發謝玄

文昏旦扁舟去江山幾路分上潮吞海日歸雁出湖雲



詩思應須苦猿聲莫厭聞離居見新月那得不思君

奉陪郭常侍宴瀝川山池

掖垣携愛客勝地賞年光向竹過賓館尋山到妓堂歌  
聲掩金谷舞態出平陽地滿簪裾影花添蘭麝香鶯啼  
春未老酒冷日猶長安石風流事須歸問一作騎省郎

冠中送張司馬歸洛

戎狄寇周日衣冠適洛年客亭新驛騎歸路舊人烟吾  
道將東矣秋風更颯然雲愁百戰地樹隔兩鄉天旅思

蓬飄陌驚魂雁怯弦今朝一樽酒莫惜醉離筵

奉和宣城張太守南亭秋夕懷友

池館蟬蛩聲梧桐秋露晴月臨朱戟靜河近畫樓明捲  
幔浮涼入聞鐘永夜清片雲懸曙斗數雁過秋城羽扇  
揚風暇瑤琴悵一作寄別情江山飛麗藻謝朓讓前名

過山人所居因寄諸遺補

空谷春雲滿愚公晦跡深一隨玄豹隱幾換綠蘿陰絕  
徑人稀到芳蓀我獨尋厨烟住峭壁酒氣出重林蝴蝶

晴還舞黃鸝晚暫吟所思青瑣客瑤草寄幽心

過鳴皋隱者

礪石老紅鮮徵君卧幾年飛

一作百

泉出林下仄徑過

作

窮

崖巔鷄犬逐人靜雲霞宜地偏終朝數峰勝不遠一

壺前仲月霽春雨香風生藥田丹溪不可別瓊草色芊  
芊

送楊鎬歸隱

悔作掃門事還吟招隱詩今年芳草色不失故山期選

想白雲裏采苓春日遲  
溪花藏石徑巖翠帶茅茨  
九轉莫飛去三迴良在茲  
還嗤茂陵客貧病老明時

酬劉起居卧病見寄

承顏看彩服不覺別丹墀  
味道能忘病過庭更學詩  
繚垣多畫戟遠岫入書帷  
竹靜携琴處林香讓果時  
聲同叨眷早交淡在年衰  
更枉蕪金贈難為繼組詞

陪南省諸公宴殿中李監宅

將門高勝霍相子寵過韋  
宦貴攀龍後心傾待士時  
壺

觴開雅宴鶯鷺眷相隨舞退燕姬曲歌徵謝朓詩晚鍾  
過竹靜醉客出花遲莫惜留餘興良辰不可追

山齋讀書寄時校書杜叟

日愛蘅芳下閑觀山海圖幽人自守朴窮谷也名愚倒  
嶺和溪雨新泉到戶樞叢蘭齊稚子蟠木老潛夫憶戴  
差過剡遊仙慣入壺濠梁時一訪莊叟亦吾徒

晚歸藍田舊居

雲卷東臯下歸來省故蹊泉移憐石在林長覺原低舊

欽定四庫全書

錢仲文集  
卷七

七

里情難盡前山賞未迷  
引藤看古木嘗酒呷春鷄  
興與時髦背年將野老  
齊才微甘引退應得遂霞棲

太子李舍人城東別業與二三文友逃暑

下馬夫炎暑重門深綠簟  
宮臣禮嘉客林表開蘭堂  
茲夕興難盡澄壘照墨塲  
東陵晚來好目極趣何長  
烏道掛疎雨人家殘夕陽  
城隅擁歸騎留醉戀瓊芳

寄袁州李嘉祐員外

誰謂江山阻心親夢想偏  
容輝常在目離別任經年  
郡

國通流水雲霞共遠天行春鶯幾轉遲客月頻圓鴈有  
歸鄉羽人無訪戴船願徵黃霸入相見玉堦前

禁闈翫雪寄薛左丞

玄雲低禁苑飛雪滿神州虛白生臺榭寒光入冕旒粉  
凝宮壁靜乳結洞門幽細繞迴風轉輕隨落羽浮怒濤  
堆砌石新月孕簾鉤為報詩人道豐年誦聖猷

春暮過石龜谷題溫處士林園

隱几無名老

間氣作垂  
白無名者

何年此陸沉丘園自

間氣  
作應

得性

欽定四庫全書

錢謙文集  
卷七

婚嫁不嬰心歲計因山薄霞棲在谷深設

間氣作盧

連草

色晒藥背松陰觸興雲生岫隨耕鳥下林  
搯頤笑來客頭上有朝簪

宿畢侍御宅

交情頻更好子有古人風晤語清霜裏平生苦節同心  
惟二仲合室乃一瓢空落葉寄秋菊愁雲低夜鴻薄寒  
燈影外殘漏雨聲中明發南昌去迴看御史驄

中書遇雨



濟旱惟宸慮為霖即上台雲銜七曜起雨拂九門來綸  
閣飛絲度龍渠激溜迴色翻池上藻香裊鼎前梅湘燕  
皆舒翼沙鱗豈曝腮尺波應為假虞海載沿洄

適楚次徐城

去家隨旅鴈幾日到南荆行邁改鄉邑苦辛淹晦明畏  
途在淫雨未暮息趨程窮木對秋館寒鴉愁古城迷津  
坐為客對酒默含情感激念知己匣中孤劍鳴

經李蒙潁陽舊居

同心而早世天道亦何論獨有山陽宅平生永不諼青  
溪引白鳥流涕弔芳蓀蔓草入空室叢篁深毀垣舊遊  
還在眼神理更忘言唯見東山月人亡不去門

贈漢陽隱者

當年不出世知子食霞人樂道復安土遺榮長隱身  
衡茅古林曲秔稻清江濱桂棹為漁暇荷衣禦暑新  
歎顏行在役幽興惜今晨分首天涯去再來芳杜春

巨魚縱大壑

巨魚縱大壑遂性似乘時奮躍風生鬣騰凌浪鼓鰭龍  
攄回地軸鯢化想天池方快吞舟意尤殊在藻嬉傾危  
嗟幕燕隱晦謂泥龜喻士逢明主才猷得所施

錢仲文集卷七

欽定四庫全書

錢仲文集卷八

唐 錢起 撰

五言六韻近體十一首

七韻六首

八韻十五首

九韻一首

十韻二首

十二韻三首

送李九歸河北

文武資人望  
謀猷簡聖情  
南州初卧鼓  
東土復維城  
寄

重分符去威仍出閫行斗牛移八座日月送雙旌別戀  
瞻天起仁風應物生佇聞收組練鏘玉會承明

送丁著作佐台郡

多年金馬客名遂動歸輪佐郡紫書下過門朱綬新揚  
舲望海嶽入境背風塵水驛偏乘月梅園別受春帶經  
臨府吏鱸鯉待鄉人始見美高士逍遙在搢紳

送王使君赴太原行營

太白明無象皇威未戢戈諸侯持節鉞千里控山河漢

驛雙旌度胡沙七騎過驚烽連鴈起牧馬入雲多不賣

盧龍塞能消瀚海波須傳出師頌

一作表

莫奏式微歌

送王使君移鎮淮南

共許徐方牧能臨河內人郡移棠轉茂車至鹿還馴吏  
事嘉師旅驚行惜搢紳別心傾祖席愁望盡征輪紫詰  
徵黃晚蒼生借冠頻願言青鎖拜早及上林春

李四勸為尉氏尉李七勉為開封尉

惟伯與仲有  
令譽因美之

美政惟兄弟時人數俊賢皇枝雙玉樹吏道二梅仙自

理堯唐俗唯將禮讓傳  
采蘭花萼聚就日鴈行  
聯黃綬俄三載青雲未  
九遷廟堂為宰制幾日  
試龍泉

春夜宴任六昆季宅

際晚綠烟起入門芳樹  
深不才叨下客喜宴齒  
諸簪夜月仍携妓清風  
更在林彩毫揮露色銀  
燭動花陰自接通家好  
應知待士心向隅逢故  
識茲夕願披襟

閑居酬張起居見贈

在林非避世守拙自離  
羣弱羽謝風水窮愁依  
典墳良



知不遐棄新詠獨相聞能使幽興苦坐忘清景曛前山  
帶喬木暮鳥聯歸雲向夕野人思難忘騎省文

奉和王相公秋日戲贈元校書

才妙心仍遠名跡跡可追  
清秋聞禮暇新雨到山時  
勝事唯愁盡幽尋不厭遲  
弄雲憐鶴去隔水許僧期  
賢相敦高躅雕龍憶所思  
芙蓉洗清露願比謝公詩

過楊駙馬亭子

衣冠在漢庭臺榭接天成  
彩鳳翻簫曲祥鱸入館名  
歌

鍾芳月曙林嶂碧雲生亂水歸潭淨高花映竹明退朝  
追宴樂開閣一作  
沉轄醉簪纓長袖留嘉客栖烏下禁城

山下別杜少府

把手意難盡前山日漸低情人那忍別宿鳥尚同棲寸  
晷戀言笑佳期欲阻睽離雲愁出岫去水咽分溪莊叟  
幾虛說楊朱空自迷傷心獨歸路秋草更萋萋

晚出青門望終南別業

能清謝朓思暫下承明廬遠山新水下寒臯微雨餘更

憐歸鳥去宛到卧龍居笑指叢林上閑雲自卷舒寧心  
鳴鳳日却意釣璜初處貴有餘興伊周位不如

送嚴士良侍奉詹事南遊

疏傳獨知止曾參善愛親江山侍行邁長幼出囂塵握  
手想千古此心能幾人風光滿長陌草色傍征輪日夕  
望荆楚鷺鳴芳杜新漁煙月下淺花嶼水中春點翰遙  
相憶含情向白蘋

題秘書王迪城北池亭

子喬來魏闕明主賜衣簪從宦辭人事同塵即道心還  
追大隱跡寄此鳳城陰昨夜新煙雨池臺清且深伏泉  
通粉壁迸笋出花林晚沐常多暇春一作香醪時獨斟西  
南漢宮月復對綠窻琴一作吟

過王舍人宅

入門花柳暗知是近臣居大隱心何遠高風物自疎脩  
然靜者事究得上皇餘鷄犬偷仙藥兒童授道書清吟  
送客後微月上城初彩筆有新詠文星垂太虛承恩金

殿宿應薦馬相如

過瑞龍觀道士

不知誰氏子鍊魄家洞天鶴待成丹日人尋種杏田靈  
山含道氣物性皆自然白鹿顧瑞草驪龍蟠玉泉得茲  
象外趣便割區中緣石竇采雲母霞堂陪列仙主人善  
止客柯爛忘歸年

送沈沖

天樸非外假至人常宴如心期邈霄漢詞律響瓊琚舉

酒常歎惜無人達子虛夜光失隋掌驥騄伏鹽車  
考室晉山下歸田秦歲初寒雲隨路合落照下城餘  
千里還同衎無勞怨索居

和韋侍御寓直對雨

名貫四科首班宜二妙齊如何厭白簡未得步金  
闈寓直晦秋雨吟餘聞遠鷄漏聲過旦冷雲色向  
窻低誰謂霄漢近翻嗟心事睽蘭滋人未握霜曉  
鷄還棲佇見田郎字親勞御筆題

奉和聖制登朝元閣

六合紆玄覽重軒啓上清石林飛棟出霞頂泰階平拂  
曙鑾輿上睇陽瑞雪晴翠微回日馭丹巘駐天行御氣  
升銀漢垂衣俯錦城山通玉苑迴河抱紫闕明感物乾  
文動凝神道化成周王陟喬岳列辟讓英聲

奉和杜相公移長興宅奉呈元相公

守貴常思儉平津此意深能卑丞相宅何謝故人心種  
蕙初抽帶移簾不改陰院梅朝助鼎池鳳夕歸林覺路

經中得滄洲夢裏尋道高仍濟代恩重豈投簪報國誰  
知己推賢共作霖興來文雅振清韻擲雙金

送任先生任唐山丞

再命果良願幾年勤說詩上公頻握髮才子共垂帷琢  
玉成良器出門偏愴離腰章佐墨綬耀錦到茅茨樹老  
見家日潮平歸縣時衣催蓮女織頌聽海人詞鴻鵠志  
應在荃蘭香未衰金門定回首雲路有佳期

送外甥懷素上人歸鄉侍奉



釋子吾家寶神清慧有餘能翻梵王字妙盡伯英書遠  
鶴無前侶孤雲寄太虛往來輕世界醉裏得真如飛錫  
離鄉久寧親喜臘初故池殘雪滿寒柳霽煙疎壽酒還  
嘗樂晨餐不薦魚遙知禪誦外健筆賦閑居

送張中丞赴桂州

出守求人瘼推賢動聖情紫臺初下詔皂蓋始專城寵  
借飛霜簡威加却月營雲衢降五馬林水引雙旌夙仰  
敦詩禮嘗聞偃甲兵戍樓雲外靜訟閣竹間清化佇還

珠美心將片玉貞冠恂朝望重計日謁承明

送王相公赴范陽

翊聖銜恩重頻年按節行安危皆報國文武不緣名受  
服仍調鼎為霖更洗兵幕開丞相閣旗總貳師營料敵  
知無戰安邊自一作示有征代雲橫馬首燕鴈拂笳聲去

鎮關河靜歸看日月明欲知瞻戀一作望切遲暮一書生

送蔣尚書居守東都

鳳輦幸秦久周人僣帝情若非君敏德誰鎮洛陽城

前席命才彥舉朝推令名綸言動北斗職事守東京鄭  
履下天去遽輪滿路聲出關秋樹直對闕遠山明肅肅  
保釐處水流宮苑清長安日西笑朝夕袞衣迎

送李兵曹赴河中

能荷鐘鼎業不矜紉綺榮侯門三事後儒服一書生昔  
志學文史立身為士英驪珠難隱曜臯鶴會長鳴休命  
且隨牒候時常振纓寒蟬思關柳匹馬向蒲城秋日黯  
將暮黃河如欲清黎人思坐嘯知子樹佳聲

罷官後酬元校書見贈

心期悵已阻交道復何如自我辭丹闕惟君到故廬忘

機貧負米憶戴出無車

一本作未忘金馬  
詔猶負茂陵書

隣犬吠初服

家人愁斗儲秋堂入閑夜雲月思離居窮巷聞砧冷荒  
枝應鵲踈宦名隨落葉主事感枯魚流水仍揮手知音  
未棄余

同鄔戴關中旅寓

文士皆求遇今人誰至公靈臺一寄宿楊柳再春風更

惜忘形友頻年失志同羽毛

一作衣

齊燕雀心事阻鴛鴻

留滯羨歸養飛鳴恨觸籠  
橘懷鄉夢裏書去客愁中殘  
雪迷歸鴈韶光棄斷蓬  
吞悲問唐舉何路出屯蒙

### 新豐主人

明代少知己夜光頻暗投  
迺遭終薄命動息盡窮愁  
自欲歸飛鷁當為不繫舟  
雙垂素絲淚幾獎皂貂裘  
暮鳥栖幽樹孤雲出舊丘  
蛩悲衣褐夕雨暗轉蓬  
秋客裏馮諷劍歌中  
寧戚牛主人能縱酒一醉且忘憂

夕遊覆釜山道士觀因登玄元廟

冥搜過物表洞府次溪傍  
已入瀛洲遠誰言仙路長  
孤煙出深竹道侶正焚香  
鳴磬愛山靜步虛宜夜涼  
仍同象帝廟更上紫霞岡  
霽月懸琪樹明星映碧堂  
傾思丹竈術願采玉芝芳  
倘把浮丘袂乘雲別舊鄉

陪郭常侍令公東亭宴集

盛業山河列重名劍履榮珥貂  
為相子開閣引時英  
美景池臺色佳期宴賞情  
詞人載筆至仙妓出花迎  
暗竹

朱輪轉迴塘玉珮鳴舞衫招戲蝶歌扇隔啼鶯飲德心  
皆醉披雲興轉清不愁懽樂盡積慶在和羹

栢崖老人號無名先生男削髮女黃冠自以雲泉  
獨樂命予賦詩

古也憂婚嫁君能樂性腸

一作道場

長男棲月宇少女炫霓

裳問爾飡霞處春山之桂旁鶴前飛九轉壺裏駐三光  
與我開龍嶠披雲靜樂堂胡麻兼藻綠石髓隔花香帝  
力言何有椿年喜漸長窅然高象外寧不做羲皇

贈李十六

半面喜投分數年欽盛名常思夢顏色誰憶訪柴荆忽  
聽歎扉嚮欣然倒屣迎蓬蒿駐騶馭鷄犬傍簪纓酌水  
卽嘉宴新知甚故情僕夫視日色棲鳥催車聲自爾宴  
言後至今門館清何當更乘興林下已苔生

裴僕射東亭

鳳宸任匡濟雲溪難退還致君超列辟得道在紫班朱  
戟繚垣下高齋芳樹間隔花開遠水廢巷愛晴山晚沐



值清興知音同解顏藉蘭開賜酒留客下重關仙犬逐  
人淨朝車映竹閑則知真隱逸未必謝區寰軒后三朝  
顧赤松何足攀

中書王舍人輞川舊居

幾年家絕壑滿逕種芳蘭帶石買松貴通溪漲水寬誦  
經連谷嚮吹律減雲寒誰謂桃源裏天書問考察一從  
解蕙帶三入偶蟬冠今夕復何夕歸休尋舊歡片雲隔  
蒼翠春雨半林湍藤長穿松蓋花繁壓藥欄景深青眼

下興絕米毫端笑向同來客登龍此地難

送襄陽盧判官奏開河事

千里趨魏闕一言簡聖聰  
河流引關外國用贍秦中有  
詔許其策隨山興此功連  
雲積石阻計日安波通飛  
棹轉年穀利人勝歲豐言  
歸漢陽路拜首蓬萊宮紫  
殿賜衣出青門斟酌同晚  
陽過微雨秋水見新鴻坐  
惜去車遠愁看離館空因  
思郢川守南楚滿清風

奉送戶部李郎中充晉國副節度出塞

德佐調梅用忠輸擊虜年子房推廟略漢主記兵權受  
命榮中禁分麾鎮左賢風生黑山道星下紫微天始願  
文經國俄看武定邊鬼方堯日遠幕府代雲連汗馬將  
行矣盧龍已肅然關防驅使節花月眷離筵自忝知音  
遇而今感義偏泪聞橫吹落心逐去旌懸帝念夔能政  
時須說濟川勞還應即爾朝暮玉墀前

奉和中書常舍人晚秋集賢院即事寄徐薛二侍

御

文星垂太虛辭伯綜羣書彩筆下鴛掖褒衣來石渠典  
墳探奧旨造化觀權輿述聖魯宣父通經漢仲舒憲明  
宜縹帶地肅近丹除清晝刪詩暇高秋作賦初露盤侵  
漢幄宮柳度鷗疎靜對連雲閣晴聞過闕車舊僚云出  
矣晚歲復何如海嶠瞻歸路江城夢直廬含毫思兩鳳  
望遠寄雙魚定笑巴歌拙還叅麗曲餘

和范郎中宿直中書曉翫清池贈南省同僚兩垣  
遺補

青瑣留才子春池靜禁林自矜仙島勝宛在掖垣深引

派彤庭裏含虛玉砌陰漲來知聖澤清處見天心蘭氣

飄紅岸文星動碧潯鳳樓長近日虬卧欲為霖席寵雖

高位流謙乃素襟焚香春殘一作漏盡假寐曉鶯吟丹地

宜清北一作切朝陽復照臨司言兼逸趣鼓興接一作屬知

音六義驚一作先摘藻三臺嚮擲金為憐風水外落羽此

漂沉一作飛沉

欽定四庫全書

錢仲文集  
卷八

十三

錢仲文集卷八

欽定四庫全書

錢仲文集卷九

唐 錢起 撰

七言四韻近體四十五首

同程九早入中書

漢家賢相重英奇  
蟠木何材也見知  
不意雲霄能自致  
空驚鵝鷺忽相隨  
臘雪初明栢子殿  
春光欲上萬年枝  
獨慚皇鑒明如日  
未厭螢光向玉墀

仲春宴王補闕城東小池

王孫興至幽尋好芳草春深景氣和  
藥院愛隨流水入山齋喜與白雲過  
猶嫌巢鶴窺人遠不厭叢花對客多  
醉來倚玉無餘事目送歸鴻笑復歌

夜宿靈臺寺寄郎士元

西日橫山含碧空東方吐月滿禪宮  
朝瞻雙頂青冥上夜宿諸天色界中  
石潭倒獻蓮花水塔院空聞松栢風  
萬里故人能尚爾知君視聽我心同



題郎士元半日吳村別業兼呈李長官

半日吳村帶晚霞，開門高柳亂飛鴉。  
橫雲嶺外千重樹，流水聲中一兩家。  
愁人昨夜相思苦，閨月今年春意賒。  
自嘆梅生頭似雪，却怜潘令縣如花。

猷川雪後送僧粲臨還京時避世卧疾

連步青溪幾萬重，有時共立在孤峰。  
齋到孟空飡麥雪，經傳金字坐雲松。  
呻吟獨卧猷川水，振錫先聞長樂鐘。  
回望羣山携手處，離心一一涕無從。

和李員外扈駕幸溫泉宮

未央月曉度疎鐘，鳳輦時巡出九重。  
雪霽山門迎瑞日，雲開水殿候飛龍。  
輕寒不入宮中樹，佳氣常薰仗外峰。  
遙羨枚臯扈仙蹕，偏承霄漢渥恩濃。

長信怨

長信螢來一葉秋，蛾眉淚盡九重幽。  
鴛鴦觀前明月度，芙蓉闕下絳河流。  
鴛鴦衾久別難為夢，鳳管遙聞更起愁。  
誰分朝陽夜歌舞，君王玉輦正淹留。

送河南陸少府

雲間陸生美且奇，銀章朱綬映金羈。  
自料抱材將致遠，寧嗟趨府暫牽卑。  
東城社日催巢燕，上苑秋聲散御梨。  
朝夕詔書還栢署，行看飛隼集高枝。

送李評事赴潭州使幕

湖南遠去有餘情，蘋葉初齊白芷生。  
謾說簡書催物役，遙知心賞緩王程。  
興過山寺先雲到，嘯引江帆帶月行。  
幕下由來貴無事，佇聞談笑靜黎甿。

送李九貶南陽

玉柱金壘醉不歡  
雲山驛道向東看  
鴻聲斷續暮天遠  
柳影蕭疎秋日寒  
霜降幽林霑蕙若  
弦驚翰苑失鴛鴦  
秋來回首君門阻  
馬上應歌行路難

送裴頔侍御使蜀

柱史纔年四十強  
鬚髯玄髮美清揚  
朝天繡服承恩貴  
出使星輶滿路光  
錦水繁華添麗藻  
峨眉明月引飛觴  
多才自有雲霄望  
計日應追鴛鴦行

送韋信愛子歸覲

離舟解纜到斜暉  
春水東流燕北飛  
才子學詩超露冕  
棠花含笑待斑衣  
稍聞江樹啼猿近  
轉覺山林過客稀  
借問還珠盈合浦  
何如鯉也入庭闈

送興平王少府遊梁

舊識相逢情更親  
攀歡甚少愴離頻  
黃綬罷來多遠客  
青山何處不愁人  
日斜官樹聞蟬蛻  
雨過關城見月新  
梁國遺風重詞賦  
諸侯應念馬卿貧

送張員外出牧岳州

鳳凰啣詔與何人  
善政多才寵冠恂  
臺下鶯鸞爭送遠  
岳陽雲樹待行春  
自怜黃閣知音在  
不厭彤幃出守頻  
應笑馮唐衰且拙  
世情相見白頭新

送孫十尉溫縣

飛花落絮滿河橋  
千里傷心送客遥  
不惜芸香染黃綬  
惟怜鴻羽下青霄  
雲衢有志終驤首  
吏道無媒且折腰  
急管繁絃催一醉  
顏陽不駐引征鑣

送鍾評事應宏詞下第東歸

芳歲歸人嗟轉蓬  
含情回首灞陵東  
蛾眉不入秦臺鏡  
鸛羽還驚宋國風  
世事悠揚春夢裏  
年光寂寞旅愁中  
勸君稍盡離筵酒  
千里佳期難再同

送嚴維尉河南

蕙葉青青花亂開  
少年趨府下蓬萊  
甘泉未厭揚雄賦  
吏道何勞賈誼才  
征陌獨愁飛蓋遠  
離筵只惜暝鐘催  
欲知別後相思處  
願植瓊枝向柏臺

送馬員外拜官覲省

二十為郎事漢文，鴛鴦驥子自為羣。  
筆精已許臺中妙，劍術還令世上聞。  
歸覲屢經槐里月，出師常笑棘門軍。  
莫言來往朝天遠，看取鳴鞘入斷雲。

送冷朝陽擢第後歸金陵覲省

萊子晝歸今始好，潘園景色夏偏濃。  
夕陽流水吟詩去，明月青山出竹逢。  
兄弟相歡初讓果，鄉人爭賀舊登龍。  
佳期少別俄千里，雲樹愁看過幾重。



九日宴浙江西亭

詩人九日憐芳菊  
筵客高齋宴浙江  
漁浦浪花搖素壁  
西陵樹色入秋窻  
木奴向熟懸金實  
桑落新開瀉玉缸  
四子醉時爭講習  
笑論黃霸舊為邦

和王員外晴雪早朝

紫微晴雪帶恩光  
繞仗偏隨鴛鷺行  
長信月留寧避曉  
宜春花滿不飛香  
獨看積素凝清禁  
已覺輕寒讓太陽  
題柱盛名兼絕唱  
風流誰繼漢田郎

避暑納涼

木槿花開畏日長，時搖輕扇倚繩床。  
初晴草蔓緣新筍，頻雨苔衣染舊牆。  
十旬河朔應虛醉，八柱天台好納涼。  
無事始然知靜勝，深垂紗帳詠滄浪。

早夏

楚狂身世恨情多，似病如憂正魔花。  
萼敗春多寂寞，葉陰迎夏已清和。  
鵬黃好鳥搖深紅，一作樹細白佳人著。  
紫羅軍旅閱詩裁，不得可怜風景遣如何。

題嵩陽焦道士石壁

三峰花畔碧堂懸  
錦里真人此得仙  
玉體纔飛西蜀雨  
霓裳欲向大羅天  
彩雲不散燒丹竈  
白鹿時藏種玉田  
幸入桃源因去世  
方期丹訣一延年

題延州聖僧穴

定力無涯不可稱  
未知何代坐禪僧  
默然山門霄閉月  
熒熒石壁畫燃燈  
四時樹長書經葉  
萬歲嵒懸拄杖藤  
昔日捨身緣救鵠  
今時出見有飛鷹

樂遊原晴望上中書李侍郎

爽氣朝來萬里清，憑高一望九愁輕。  
不知鳳沼霖初霽，但覺堯天日轉明。  
四野山河通遠色，千家砧杵共秋聲。  
遙想青雲丞相府，何時開閣引書生。

幽居春暮書懷

自哂鄙夫多野性，貧居數畝半臨湍。  
潞雲雜雨來茅屋，山雀將雛到藥欄。  
仙錄滿床閑不厭，陰符在篋老羞看。  
更憐童子宜春服，花裏尋師指杏壇。

謁許由廟

故向箕山訪許由  
林泉物外自清幽  
松上掛瓢枝幾變  
石間洗耳水空流  
綠苔唯見遮三徑  
青史空傳謝九州  
緬想古人增嘆惜  
颯然雲樹滿巖秋

過張成侍御宅

丞相幕中題鳳人  
文章心事每相親  
從軍誰謂仲宣樂  
入室方知顏子貧  
盃裏紫茶香代酒  
琴中綠水靜留賓  
欲知別後相思意  
唯願瓊枝入夢頻

酬考功楊員外見贈佳句

黃卷讀來今已老  
白頭受屈不曾言

上林諫獵知才薄尺組承恩愧命牽  
潢潦難滋滄海潤螢光空盡太陽前  
虛名濫接登龍士野性寧忘種黍田  
相國無私人守朴何辭老去上皇年

寄永嘉王十二

永嘉風景入新年才子詩成定可憐  
夢裡還鄉不相見天涯憶戴復誰傳  
花傾曉露垂如淚鶯拂遊絲斷若絃  
願得回風吹海鴈飛書一宿到君邊

七盤嶺阻寇聞李端公先到南楚

日暮窮途淚滿襟  
雲天南望羨飛禽  
阮腸暗與孤鴻斷  
江水遙連別恨深  
明月既能通憶夢  
青山何用隔同心  
秦楚眼看成絕國  
相思一寄白頭吟

酬趙給事相尋不遇留贈

誰憶顏生窮巷裏  
能勞馬跡破春苔  
忽看童子掃花處  
始愧夕郎題鳳來  
斜景適隨詩興盡  
好風纔送珮聲回  
豈無雞黍期他日  
惜此殘春阻綠盃

山中酬楊補闕見過

日煖風恬種藥時，紅泉翠壁薜蘿垂。  
幽溪鹿過苔還靜，深樹雲來鳥不知。  
青瑣同心多逸興，春山載酒遠相隨。  
却慚身外牽纓冕，未勝杯前倒接離。

同王銷起居程浩郎中韓翃舍人題安國寺用上  
入院

慧眼沙門真遠公，經行宴坐有儒風。  
香緣不絕簪裾會，禪想寧妨藻思通。  
曙後爐烟生不滅，晴來堦色並歸空。



狂夫入室無餘事唯與天花一笑同

尋司勳李郎中不遇

知己知音同舍郎如何咫尺阻清揚  
每恨蒹葭傍芳樹多慚新燕入華堂  
重花不隔陳蕃榻脩竹能深夫子墻  
唯有早朝趨鳳閣朝時怜羽接鴛行

贈張南史

紫泥何日到滄洲笑向東陽沈隱侯  
黛色晴峰雲外出穀文江水縣前流  
使臣自欲論公道才子非關厭薄遊

溪畔秋蘭雖可佩知君不得少停舟

穀江蘭溪之別名也

暇日覽舊詩因以題詠

逍遙心地得關關偶被功名浣

一作浼

我閑有壽亦將歸

象外無詩兼不戀人間何窮默識輕洪範未喪斯文勝  
大還筐篋靜開難似此藥珠春色海中山

色一作雪

漢武出獵

漢家無事樂時邕羽獵年年出九重玉帛不朝金闕路  
旌旗長繞絳霞峰且貪原獸輕黃屋寧畏漁人犯白龍

薄暮方歸長樂觀  
垂楊幾處綠烟濃

宴曹王宅

賢王駟馬退朝初  
小苑三春帶雨餘  
林沼蔥蘢多貴氣  
樓臺隱映接天居  
仙鷄引敵穿紅藥  
宮燕銜泥落綺疏  
自嘆平生相識願  
何如今日廁應徐

重贈趙給事

久飛鴛掖出時髦  
耻負平生稽古勞  
玉樹滿庭家轉貴  
雲衢獨步位初高  
能迂騶馭尋蝸舍  
不惜瑤華報木桃

應念潛郎守貧病常悲休沐對蓬蒿

贈闕下裴舍人

二月黃鶯飛上林春城紫禁曉陰陰長樂鐘聲花外盡  
龍池柳色雨中深陽和不散窮途恨霄漢長懸捧日心  
獻賦十年猶未遇羞將白髮對華簪

登劉賓客高齋

時公初退相

能以功成踈寵位不將心賞負雲霞林間客散孫弘閣  
城上山宜綺季家蝴蝶晴連池岸草黃鸝晚出柳園花

日陪鯉也趙文苑誰道門生隔絳紗

哭辛霽

流水辭山花別枝隨風一去絕還期昨夜故人泉下宿  
今朝白髮鏡中垂音徽寂寂空成夢容範朝朝無見時  
旦暮餘生幾息在不應存沒未嘗悲

和慕容法曹尋漁者寄城中故人

孤烟一點綠溪湄漁父幽居即舊基飢鷺不驚收釣處  
閉廬應乳負暄時茅齋對雪開樽好稚子焚枯飯客遲

勝事宛然懷抱裏頃來新得謝公詩

錢仲文集卷九

欽定四庫全書

錢仲文集卷十

唐 錢起 撰

五言三韻近體六首

二韻近體九首

二韻往體二十二首

七言二韻近體十九首

三韻近體一首

送楊著作歸東海

楊柳出關色東行千里期  
酒酣暫輕別路遠始相思  
欲

識離心盡斜陽到海時

送李協律還東京

芳草忽無色  
王孫復入關  
長河侵驛道  
匹馬傍雲山  
愁見離居久  
螢飛秋月閑

秋館言懷

蟋蟀已秋思  
蕙蘭仍碧滋  
蹉跎獻賦客  
歎息此良時  
日夕雲臺下  
商歌空自悲

和劉明府宴縣前山亭



城隅勞心處雪後歲芳開山映千花出泉經萬井來翔  
鸞欲下舞上客且留杯

新雨喜得王卿書問

苦雨暗秋徑寒花垂紫苔愁中綠樽盡夢裏故人來果  
有相思字銀鈎新月開

賦得巢燕送客

能棲杏梁際不與黃雀羣夜影寄紅燭朝飛高碧雲含

情別故侶花月

一作宛似惜春分

送李明府去官

謗言三至後直道歎何如今日藍溪水無人助一作昂夜

魚

赴章陵酬李卿贈別

一官叨下秩九棘謝知音芳草文園路春愁滿別心

逢俠者

燕趙悲歌士相逢劇孟嘉寸心言不盡前路日將斜

郎員外見尋不遇

軒騎來相訪，漁樵悔晚歸。  
更怜垂露跡，花裏點牆衣。

過李

一作呂

侍御宅

不見承明客，愁聞長樂鐘。

一作翰墨成千古恩榮謝九重

馬卿何早世

漢主欲登封

宿洞口館

或作耿碑詩

野竹通溪冷，秋泉入戶鳴。  
亂來人不道，芳草上階生。

九日寄姪孫箕等

采菊偏相憶，傳香寄便風。  
今朝竹林下，莫使桂樽空。

梨花

艷靜如籠月香寒未逐風  
桃花徒照地終被笑妖紅  
題崔逸人山亭

藥徑深紅蘚山窻滿翠微  
羨君花下酒蝴蝶夢中飛  
藍田溪雜詠二十二首

望山登春臺目盡趣難極  
晚景下平阡花際霞峰色  
右登臺

靜宜樵隱度遠與車馬隔  
有時行樂來喜遇歸山客

右板橋

片霞照仙井泉底桃花紅那知幽石下不與武陵通

右石井

引蔓出雲樹垂絲覆巢鶴幽人對酒時苔上閑花落

右古藤

池上靜難厭雲間欲去晚忽背夕陽飛乘興清風遠

右晚歸鷺

幾轉到青山數重度流水秦人入雲去知向桃源裏

右洞仙謠

春畦生百藥花葉香初霽好客似風光偏來入叢蕙

右藥圃

靜與溪色連幽宜松雨滴誰知古石上不染世人跡

右石上苔

遠岫見如近千里一窻裏坐來石上雲乍謂壺中起

右窓裏山

暗歸草堂靜半入花園去有時載酒來不與清風遇

右竹間路

幽鳥清連上興來看不足新篁壓水低昨夜鴛鴦宿

右竹嶼

穿雲來自遠激砌流偏駛能資庭戶幽更引海禽至

右砌下泉

乍依菱蔓聚盡向蘆花滅更喜好風來數片翻晴雪

右戲鷗

風送出山鐘雲霞度水淺欲知聲盡處鳥滅寥天遠

右遠山鐘

永日興難忘  
掇芳春陂曲  
新晴花枝下  
愛此苔水綠

右東陂

一作憶皇子陂

臨池構杏梁  
待客歸烟塘  
水上褰簾好  
蓮開杜若香

右池上亭

有意蓮葉間  
瞥然下高樹  
擘波得潛魚  
一點翠光去

右銜魚翠鳥

幽石生芙蓉  
百花慚美色  
遠笑越溪女  
聞芳不可識



右石蓮花

亂石跳素波寒聲聞幾處  
颼颼暝風引散出空林去

右潺溪聲

雖因朔風至不向瑤臺側  
唯助苦寒松偏明後凋色

右松下雪

田鶴望碧霄無風亦自舉  
單飛後片雲早晚及前侶

右田鶴

家住鳳城南門臨古陂  
曲時憐上林鴈半入池塘宿

右題南陂

送崔山人歸山

東山殘雨挂斜暉  
野客巢由指翠微  
別酒稍酣乘興去  
知君不羨白雲歸

題禮上人壁畫山水

連山畫出映禪扉  
粉壁香筵滿翠微  
坐來爐氣縈空散  
共指晴雲向嶺歸

送歐陽子還江華郡

江華勝事接湘濱千里湖山入興新才子思歸催去棹  
汀花且為駐殘春

暮春歸故山草堂

谷口春殘黃鳥稀辛夷花盡杏花飛始憐幽竹山窓下  
不改清陰待我歸

訪李卿不遇

畫戟朱樓映晚霞高梧寒柳度飛鴉門前不見歸軒至  
城上愁看落日斜

與趙莒茶讌

竹下忘言對紫茶  
全勝羽客醉流霞  
塵心洗盡興難盡  
一樹蟬聲片影斜

故王維右丞堂前芍藥花開悽然感懷

芍藥花開出舊欄  
春衫掩泪再來看  
主人不在花長在  
更勝青松守歲寒

送張叅及第還家

大學三年聞琢玉  
東堂一舉早成名  
借問還家何處好

玉人含笑下機迎

夜泊鸚鵡洲

月照溪邊一罩蓬  
夜聞清唱有微風  
小樓深巷敲方響  
水國人家在處同

歸鴈

瀟湘何事等閑回  
水碧沙明兩岸苔  
二十五絃彈夜月  
不勝清怨却飛來

春郊

水遶永渠漸有聲氣融煙塢晚來明東風好作陽和使  
逢草逢花報發生

晚歸嚴明府題門

降士林霑蕙草寒強驚翰苑失鴛鴦秋中回首君門阻  
馬上應歌行路難

秋夜送趙冽歸襄陽

斗酒忘言良夜深紅萱露滴鵲驚林欲知別後思今夕  
漢水東流是寸心

送符別駕還郡

驥足駸駸吳越關  
屏星復與紫書還  
已知從事元無事  
城上愁看海上山

同王負外隴城絕句

三軍版築脫金刀  
黎庶翻慚將士勞  
不憶新城連嶂起  
唯驚畫角入雲高

過故洛城

故城門前春日斜  
故城門裏無人家  
市朝欲認不知處

漠漠野田空草花

校獵曲

長楊殺氣連雲飛  
漢主秋畋正掩圍  
重門日宴紅塵出  
數騎胡人獵獸歸

晚過橫霸寄張藍田

亂水東流落照時  
黃花滿徑客行遲  
林端忽見南山色  
馬上還吟陶令詩

九日田舍



今日無家野興偏  
東籬黃菊映秋田  
浮雲暝鳥飛將盡  
始達青山新月前

題張監田訟堂

角巾高枕向晴山  
訟簡庭空不用闌  
秋風窓下琴書靜  
夜一作落景門前人吏閑  
稍覺淵明歸思遠  
東臯月出片雲還

江行無題

傾酒向漣漪  
乘流欲去時  
寸心同尺璧  
投此報馮夷

其二

江曲全縈楚雲飛半自秦峴山回首望如別故鄉人

往年累登峴亭

其三

浦烟寒永夜冷日轉秋旻自有沉碑在清光不照人

其四

楚岸雲空合楚城人不來祇今誰善舞莫恨廢章臺

其五

行背青山郭吟當白露秋風流無屈宋空詠古荊州

其六

晚來漁父喜網重欲收遲恐有長江使金錢願贖龜  
其七

去指龍沙路徒懸象闕心夜涼無遠夢不為偶聞砧  
其八

霽雲疎有葉雨浪細無花穩放扁舟去江天自有涯  
其九

好日長秋半層波動旅腸已行千里外誰與共秋光  
其十

潤色非東里官曹更建章官遊難自定來喚擢船郎

其十一

夜江清未曉徒惜月光沉不是因行樂堪傷老大心

其十二

翳日多喬木維舟取東薪靜聽江叟語盡是厭兵人

其十三

箭漏日初短汀烟草未衰雨微雖更綠不是採蘋時

其十四

山水夜來漲喜魚跳滿江岸沙平欲盡垂蓼入船窓

其十五

渚邊新鴈下舟上獨淒涼俱是南來客  
怜君垂一行

其十六

雲密連江暗風斜著物鳴一杯真戰將  
笑爾作愁兵

其十七

柳拂斜陽路籬邊數戶村可能還有意  
不掩向江門

其十八

不識相如渴徒吟子美詩江清惟獨看心外更誰知

其十九

牽路沿江狹沙崩岸不平盡知行處險誰肯載時輕

其二十

憔悴異靈均非讒作逐臣如逢漁父問未是獨醒人

其二十一

水含秋色靜雲帶夕陽高詩癖非吾病何妨吮短毫

其二十二

帶舟維古岸還似阻西陵箕伯無多少回頭詎不能

其二十三

秋雲久無雨江燕社猶飛却笑舟中客今年未得歸

其二十四

帆翅初張處雲鵬怒翼同莫愁千里路自有到來風

其二十五

佳節雖逢菊浮生正似萍故山何處望荒岸小長亭

其二十六

月下江流靜村荒人語稀鷺鷥雖有伴仍共影雙飛

其二十七

斗轉月未落舟行夜已深有村知不遠風便數聲砧

其二十八

棹驚沙鳥迅飛濺夕陽波不顧魚多處應防一目羅

其二十九

行到楚江岸蒼茫人正迷  
祗如秦塞遠格磔鷓鴣啼

其三十



漸覺江天遠難逢故國書可能無往事空食鼎中魚

其三十一

岸草連荒色村聲樂稔年晚晴貪穫稻閑却採菱船

其三十二

灘淺多遊鷺江清易見魚恠來吟未足秋物欠紅蕖

其三十三

蛩響依沙草螢飛透水煙夜涼誰詠史空泊運租船

其三十四

睡穩葉舟輕風微浪不驚人居蘆葦岸終夜動秋聲

其三十五

自念平生意曾期一郡符可知因謫宦斑鬢入江湖

其三十六

水天涼夜月不是少清光好景隨人物秦淮憶建康

其三十七

古來多思客搖落恨江潭今日秋風至蕭疎過沔南

其三十八

映竹疑村好穿蘆覺渚幽  
漸安無曠土薑芋當農收

其三十九

煙渚復煙渚畫屏休畫屏  
引愁天末去數點暮山青

其四十

秋風動客心寂寂不成吟  
飛上危檣立啼鳥不知音

其四十一

見底高秋水開懷萬里天  
旅吟還有伴沙柳數枝蟬

其四十二

九日自佳節扁舟無一杯曹園舊罇酒戲馬憶高臺

其四十三

兵火有餘燼貧村纔數家無人爭曉渡殘月下寒沙

其四十四

渚禽菱芡足不向稻梁爭靜宿涼灣月應無失侶聲

其四十五

輕雲未撲霜樹杪橘初黃信是知名物微風過水香

其四十六

土曠深耕少江平遠釣多平生皆棄本金革竟如何

其四十七

海月非常物等閑不可尋披沙應有地淺處定無金

其四十八

風晚冷颼颼蘆花已白頭舊來紅葉寺堪憶玉京秋

其四十九

渺渺望天涯清連浸赤霞難逢星漢使烏鵲日乘槎

其五十

風好來無陣雲開去有踪釣歌無遠近應喜罷艤艫

其五十一

吳疆連楚甸楚俗異吳鄉謾把罇中物無人啄蟹黃

其五十二

岸綠野烟遠江紅斜照微撐開小魚艇應到月明歸

其五十三

雨餘江始漲漾漾見流薪曾嘆溝中木斯言憶故人

其五十四

垂露曉猶濃清風不易逢涉江雖已晚高樹攀芙蓉

其五十五

乘舟維夏口煙野獨行時不見頭陀寺空懷幼婦碑

其五十六

晚泊武昌岸津亭踈柳風數株曾手植好事憶陶公

其五十七

舟航依浦定星斗滿江寒若比陰霾日何方夜未闌

其五十八

近戍離金落孤岑望火門  
唯將知命意瀟洒向乾坤

其五十九

叢菊生隄上此花長後時  
有人還採掇何必有春期

其六十

景夕殘霞落秋寒細雨晴  
短纓何用濯舟在月中行

其六十一

堤壞漏江水地坳成野塘  
晚荷人不折留取作秋香

其六十二



失宦終何路，攄懷亦自寬。  
襏褌嘲白鷺，無意喻臯鸞。

其六十三

樓空人不歸，雲似去時衣。  
黃鶴無心下，長應笑令威。

其六十四

白帝朝驚浪，陽臺暮應雲。  
等閑生險易，世路祇如君。

其六十五

櫓一作蘆慢生輕浪，帆虛帶白雲。  
客船雖狹小，容得庾將軍。

軍

其六十六

靜看秋江水風微浪漸平人間馳競處塵土自波成

其六十七

風借帆方疾風回棹却遲較量人世事不校一毫釐

其六十八

咫尺愁風雨匡廬不可登祇疑香霧窟猶有六朝僧

其六十九

江草何多思冬青尚滿洲誰能驚鵬鳥作賦為沙鷗

其七十

幸有煙波興寧辭筆硯勞緣情無怨刺却似反離騷

其七十一

沙上獨行時吟高到楚詞難得垂岸蓼盈把當江蘼

其七十二

秋寒鷹隼健逐雀下雲空知是江湖客無心擊塞鴻

其七十三

幽懷念煙水長恨隔龍沙今日滕王閣分明見落霞

其七十四

江流何渺渺懷古獨依依漁父非賢者蘆中但有磯

其七十五

遠謫歲時晏暮江風雨寒仍愁繫舟處驚夢近長灘



錢仲文集卷十